



ATASSUT

UKA 2016/79-1

Siverth K. Heilmann

20. 10. 2016

Inatsisartunut aalajangiiffisassatut siunnersuutigineqarpoq Naalakkersuisut peqquneqassasut Inatsisartut 2017-imi upernaakkut ataatsimiinnerannut atatillugu ukiunut sisamanut misileraataasumik aqqissuussineq, nammineq inigisap aserfallatsaalineqarneranut imaluunniit nukimmik sipaarnerunissamut sanasunik suliaqartitsinermut atatillugu aningaasartuutit kattillugit 20.000,00 kr inummut ataatsimut akileraarutitigut ilanngatigineqarsinnaalernissaanik suliaqassasut. Ukiut misileraaffiusut tamarmik ukiumut 3.000.000 kr-nik aningaasanut inatsimmi illikartitsiviussaaq. Ukiut sisamat misileraaffiusut ingerlareerpata misileraaneq nalilersuiffigineqassaaq.

(Inatsisartuni ilaasortaq Steen Lynge, Atassut)

Aallaqqaammut inatsisartuni ilaasortaq Steen Lynge, Atassut qutsavigissavarput, soqutiginarluinnartumik aalajangiiffisassatut siunnersuuteqarninnut, imatullu naatsumik ATASSUT-miit oqaaseqarfigissavarput.

Siunnersuuteqartoq tunngavilersuuteqarnermini ilumoorluinnarpoq, sapinngisamik innuttaasut amelanerpaat namminneq ineqalernissaat aamma aningaasalersueqataasinnaaneri inuiaqatigiinni sumiluunniit pitsaasumik aningaasaqarnermut tunngavisseeqataasarmat. Taamatullu politikkeqarneq ATASSUT-ip politikikkut anguniagaanut pingaarutilinnut ilaalluinnarpoq.

Illuutillit iniutillilluunniit amerlanerusut inigisap nukimmik sipaarnerusinnaanermik ikummatissamillu atuinikinnerulernissamut kiisalu nammisersortunik suliffissaqartitsinerulernissamut aqqutissat ilagilluarsinnaammassut siunnersuut tunngaviatigut ilalerparput, taamaattorli Naalakkersuisut akisuteqarnerannut siunnersuummullu paasinnilluarlutik, allanguutissamik inatsisartunut siunnersuuteqarlutik saqqummiussaqaqarnerat ATASSUT-ip ilalerpaa akueralugulu.

Taamatut ATASSUT-miit oqaaseqarluta, inassutigissavarput suliap aappassaaneerneqannginnerani ataatsimiititaliami sukumiisumik nalilersuisoqarnissaa.

Qujanaq.